



有時有日

見擺係有人講起「有時有日會仰般仰般」，佢个心肝肚斯浮出當多畫面，因為這係佢姆盡肯講个一句話，還細時節係聽著，成時會著驚、成時有想望，全看佢姆講這句話該下个情況攞心情仰般。有一隻恁樣个詞彙分佢又驚又期待，實在當特別。

佢兄弟姊妹多，相捶鬥打像食飯恁平常，見冤家，佢姆斯會一頭詐意尋竹筱仔，一頭大嫵聲罵：「再過冤家哪！有時有日佢較閒兜，會分佢用竹筱仔拌。」佢姆罵人个架勢當得人驚，雖然相打个毋係佢，毋過佢從細斯無膽，聽著會嚇死！當驚哪日佢姆心情毋好，嘎變成該隻「有時有日」分竹筱仔拌个衰鬼，該斯死無命咧！

細細戴个莊下無火車經過，連火車斯罕得看著，毋好講坐火車咧。該下佢最大个願望斯係著等新衫坐火車去台北看大樓、坐電梯；去兒童樂園搞、去動物園看大象。見要求阿姆渡佢兜去，佢斯講：「係乖乖聽話，有時有日佢會渡你兜去。」還細毋知該係阿姆个推(toi)詞，戇戇對年頭等到年尾，又對今年望到明年，佢姆个「有時有日」還係無到來。最尾係跔等學校先生去遶山正達成願望。毋過該一年過一年个想望，分佢个童年帶來盡多期盼个快樂。

佢恁多姊妹毋知大人艱苦，看著中意个東西斯愛阿姆買，佢姆斯會講：「有時有日若爸賺大錢咧，你兜愛麼个斯有！」細人仔毋知阿姆係拐騙佢兜，大家黏皮斯乖乖等、脰脰仔望，等阿爸賺大錢買當多東西。結果賺大錢个日仔並無到來，毋過佢兜愛買个東西，因為阿爸惜子也從來毋識少過，所以有時有日阿爸有賺大錢無，變成無要無緊咧。

佢一日一日大咧，「有時有日」對佢个意義也無幾共樣咧。矢志个時節，佢會鼓勵自家：「總愛煞猛，有時有日一定會成功。」傷心个時節，佢會勸話自家：「攞目汁粹燥，有時有日，所有个苦痛會變成過去，該時就係苦盡甘來个日仔咧。」盡長時間「有時有日」變成佢最好个安慰劑。

到這下个年齡，少忒講「有時有日」个資格咧，試想，還有幾多好「有時有日」呢！把扼當下，攞日仔過著滿意、精彩最重要，「有時有日」仰般仰般，斯毋好緊去妄想囉！

作者：張美容

☆詞彙學習☆

- | | |
|-------------------------------------|------------------------------|
| 【有時有日】rhiu` shi rhiu` ngid：總會有那麼一天。 | 【推詞】toi` cii：推託之語。 |
| 【相捶鬥打】siong` chui deu` da`：打架。 | 【遶山】lau` san`：遠足。 |
| 【詐意】za` rhi`：假裝。 | 【黏皮】ngiam pi：馬上。 |
| 【竹筱仔】zhug siu` er：細竹枝。 | 【脰脰仔】goi` rhog rhog er：眼巴巴的。 |
| 【拌】pan`：拿竹子來教訓、修理人。 | 【矢志】shid zhi`：失去勇氣。 |
| 【架勢】ga` she`：姿態。 | |